



*Princeps utcunque cesserit Imperio jure
Majestatis excidit.*

PRæscriptos intrâ fines dum Regia sese
 Continet, & placido devolvitur amne potestas,
 Omnia felici procedunt ordine; quales
 In Regem populi, in populum qui Regis amores!
 At rapidus veluti torrens cum rumpere ripas
 Spumeus, & fervens, & sævior obice certat,
 Cum frangit Leges, veluti sua vincula Proteus,
 Ultrò Regales à se deponit honores,
 Et Diadema suâ vellit de vertice dextrâ.
 Tum Rex est, cum justa jubet, cum fœdere certo
 Et premere, & laxas Populo dare novit habenas,
 Dum fovet in gremio Cives, & ab hoste tuetur.
 Si tamen Ipse suæ Patriæ, si civibus hostem
 Se gerit, obsequio Cives absolvimur; & Rex
 Quisque sibi suus est, & se defendere debet.
 Heu miseri quos dura premit custodia talis
 Principis, hic etenim Cives custodit ut ipsum
 Torva Leæna Lupum servat, Lupus ipse capellas.



*Furis dicendi Ratio non est Ar-
bitraria.*

Vidimus indomito leges servire Tyranno;
 Egregios sine Teste viros, sine crimine morti
 Vidimus occubuisse, & flevimus aspera Fata:
 Prætextu Legis cum desolaverit Urbes
 Judex occiduis (veluti *Sejanus*) in oris.
 Talia de vestris iterum nè stamina fufis
 Labantur, stabiles Fatorum numine Parcæ.
 Arbitrio tum Jura tuo, *Sejane*, secures
 Supposuere suas, & Te dictante locutæ
 Jussa capeſſebant licet injustissima Leges.
 Tandem Libertas *Britonas* respexit inertes;
 Jura suo fulgent iterum reparata nitore.
 Ex illo evinctæ patet area libera Legi,
 Volvitur antiquo quæ restaurata canali,
 Equâ dispensans pœnas & præmia Lance.
 Nil *Judex*, nisi quod Lex imperat, imperat ulli.
 Sic propiore Dei afflatu tumefacta Sibylla
 Cum canit ambages, trepidoque remugit in antro,
 Non sua sensa canit, sed *Phœbus* verba furenti
 Injicit, & stimulos sub pectore versat *Apollo*.

Jul.4. 1698. in Vesp. Comit. Resp. Jo. Laughton pro gradu LL.D. Coll. Trin.